

ԱՄՆ-Ի ՀԱՅՈՑ ԱՐԵՎԵԼՅԱՆ ԹԵՄԻ ՀՈԳԵՎՈՐԱԿԱՆԱՅ ՀԱՄԱԳՈՒՄԱՐԸ

ԱՄՆ-ի հայոց արևելյան թեմի հոգևորականաց համագումարը տեղի է ունենում մայիսի 27—28 օրերին, Վաշինգտոնի Ֆրանչիսկյան Քույրերի Առանձնացման կենտրոնի սրահում՝ նախագահությամբ թեմակալ առաջնորդ Տ. Թորգոմ արքեպ. Մանուկյանի:

«Թեև հոգևորականաց համագումարը զրկվեցավ Ամենայն Հայոց Հայրապետի շնորհաբեր Անձին ներկայութենեն, սակայն, որդիական ակնածանք և խորին երախտագիտությամբ ունկնդրեց Անոր օրհնության և քաջալերանքի հոգեհորոգ պատգամը»:

Հոգևորականաց համագումարին ուղղած Հայոց Հայրապետի օրհնության և ողջույնի պատգամը հրատարակվել է «Էջմիածին» ամսագրի մայիս համարում (էջ 9—12):

Այնուհետև հոգևորականաց համագումարը ձեռնամուխ է լինում օրակարգի հարցերի քննարկմանը:

Համագումարի օրերին ժողովական հայրերը լսում են նաև չորս «շահեկան և այծմեական» նյութերու շուրջ դասախոսություններ»:

Համագումարի ընթացքում «նկատի առնվեցան կանոնական, ծիսական, կարգապահական հարցեր և համապատասխան որոշումներ տրվեցան ի շինություն մեր Ս. Եկեղեցվո, վերատեսչությամբ նախագահ սրբազան հոր»:

Համագումարի օրերին հոգևոր հայրերը մասնակցում են «առանձնացման կենտրոնին մեջ, Հայց. Եկեղեցվո հասարակաց ժամապաշտությանց և ս. պատարագ մատուցվեցավ մայիսի 29-ին վաղ առավոտյան, ժամը 7.00-ին»:

Հոգևորականաց համագումարը իր աշխատանքների ավարտին Ամենայն Հայոց Հայրապետին հեռագրում է հետևյալը.

«Վեհափառ Տեր,

Հոգևորականաց տարեկան համագումարը իր որդիական սերն ու հավատարմությունը կհայտնե Զերդ. Վեհափառության որում հայրապետական պատգամը խոր ու շարժողությամբ ունկնդրվեցավ՝ անոր պարունակության և ոգիին հավատարիմ մնալու անկեղծ խոստումով»:

